

Bermulalah dari sekarang, dari detik ini. Jangan takut! Tiada tindakan yang lebih tepat selain daripada bermula. Bermula dari mana? Dari diri kita sendiri!

Yakinlah kita mampu. Berhentilah bersembunyi di sebalik zon selesa. Keluar dan lihatlah dunia yang keras. Bertarunglah dengan dunia yang kejam itu. Kita menang apabila kita bukan hanya mampu menakluki diri kita sendiri, malah menakluki dunia. Jangan tunduk kepada isi dunia, tetapi tunduklah kepada Allah s.w.t, dengan mudah dunia akan kita takluk, mudah kita genggam.

Intinya, seberapa sukar pun masalahnya, seberapa rumit pun keadaannya, jangan biarkan putus asa tertawa berbahak-bahak. Jangan biarkan lemah menguasai diri. Jadikanlah kesabaran sebagai benteng pertahanan kita. Bersabar bukan bermaksud diam. Bukan menandakan kita lemah. Bukan menyiratkan kita sedang rapuh, tetapi sabar itu adalah penguat dan penolong kita. Allah s.w.t. menyatakan:

وَاسْتَعِينُوا بِالصَّبْرِ وَالصَّلَاةِ وَإِنَّهَا لَكَبِيرَةٌ إِلَّا عَلَى
الْخَاشِعِينَ ﴿٤٥﴾

“Dan mintalah pertolongan (kepada Allah) dengan sabar dan solat. Dan sesungguhnya yang demikian itu sungguh berat, kecuali untuk orang-orang yang khusyuk.”

(Surah Al-Baqarah, ayat 45)

Bahkan, “sabar” dalam al-Quran disebut tidak kurang daripada tujuh puluh kali dan seluruhnya dalam bentuk pujian.